

PAHAYAGAN NG PARTIDO KOMUNISTA NG PILIPINAS
PINAPATNUBAYAN NG
MARXISMO-LENINISMO-MAOISMO


Bayan

Vol. XXXI No. 2

Pebrero 2001

Ang mga tungkulin ng rebolusyonaryong kilusan kaugnay ng reaksyunaryong eleksyong 2001

Ang eleksyon sa Mayo 2001 ay isang reaksyunaryong eleksyon na nasa ilalim ng kontrol ng mga mapagsamantala at mapang-aping uri. Bagamat hindi tuwirang lalahok dito, ang Partido at ang Bagong Hukbong Bayan ay magsasagawa ng mga hakbangin upang epektibong makialam sa reaksyunaryong eleksyon tungo sa pagkamit ng mga rebolusyonaryong layunin.



www.angbayan.org • editors@angbayan.org

Inilalathala ng Komite Sentral ng Partido Komunista ng Pilipinas

Nilalaman

- 1 **Editorial:** Ang mga tungkulin ng rebolusyonaryong kilusan kaugnay ng eleksiyong 2001
- 5 **Lacson:** Berdugo, trapo
- 6 **Ang patuloy na pamamayagpag ng mga pamilya at kroni ni Joseph Estrada**
- 8 **Kailangang tumayo ang usapang pangkapayapaan sa pundasyon ng mga nakaraang kasunduan**
- 10 **Palayain ang lahat ng bilanggong pulitikal!**
- 11 **Ang papet na rehimeng Macapagal (1962-65)**
- 13 **Ulat koresponsal mula sa Cagayan Valley**
- 17 **Mga balita sa pakikibaka**

PANAWAGAN

Ang Lupong Patnugot ng **Ang Bayan** ay nag-aanyaya sa mga mambabasa na mag-ambag sa pagpapahusay ng ating pahayagan sa pamamagitan ng pagbibigay ng mga komentaryo at mungkahi, mga balita o mga rebolusyonaryong karanasan na maaaring ilathala sa ating pahayagan.

Maaaring makuha ang pinakahuling isyu ng **Ang Bayan** sa internet. Magtungo sa

www.angbayan.org

Tatanggap din ng mga liham sa

editors@angbayan.org


Gagamitin ng mga rebolusyonaryo at progresibong pwersa ang lahat ng pagkakataon upang ihiwalay at labanan ang sagadsaring mga reaksyunaryo, lalong palakasin ang rebolusyonaryong armadong kilusan at ang mga pakikibakang masa para sa tunay na pagbabagong panlipunan. Kaalinsabay nito, isasagawa rin ang mga lihim at di pormal na paraan ng pakikipagtulungan sa mga mapagkaibigan at progresibong kandidato upang manalo sa halalan at buksan ang larangan ng pagkilos sa loob ng reaksyunaryong parlamento bilang karagdagang larangan ng pakikibaka.

Hindi lulutasin ng eleksiyong 2001 ang masidhing krisis ng naghaharing sistema. Dahil sa walang lubay na pukpukan ng mga nagtutunggaling paksyon, pinakamalamang na ang eleksyon sa Mayo ay magiging isa sa pinakamarumi, pinakamarahas at kung saan nagaganap ang pinakagarapal na dayaan. Bagamat maaari itong magsilbi tungo sa konsolidasyon ng rehimeng Macapagal-Arroyo sa pamamagitan ng pagpapapanalo ng mga kandidato, ang tindi ng dayaan at karahasan sa darating na eleksyon ay tiyak na magbubunga ng mas maiigting na bangga ng mga nagtutunggaling reaksyunaryong paksyon.

SA PAMAMAGITAN NG KONTROL SA kayamanan, pulis at militar, sa burukrasya at masmidya, ipinaiilalim ng mga reaksyunaryong naghaharing uri sa kanilang kapangyarihan ang eleksyon sa Pilipinas. Sa pamamagitan ng kontrol na ito, epektibong inaalis ng reaksyunaryong sistema ang anumang posibilidad na makabuluhang makalahok sa eleksyon ang mga partido o grupong kumakatawan sa interes ng masang anakpawis.

Ang mga reaksyunaryong eleksyon ay may layuning lumikha ng ilusyon ng demokrasya gayong ang katotohana'y naka-

pangyayari ang makauring diktadura ng mga mapang-api't mapagsamantala. Malaking panlilinlang ang sinasabing may demokratikong karpatan ang mamamayan dahil maaari silang pu-



mili sa dalawa o higit pang partido samantalang ang epektibo lamang na nakalalahok dito ay ang malalaking reaksyunaryong partido. Ang pagbibigay ng limitadong puwang na makalahok ang ilang progresibo at pangmasang organisasyon at partido ay nagsisilbi rin sa panlilinlang na ito.

Sa pangunahin, ang reaksyunaryong eleksyon ay isang paligsahan sa pagitan ng mga nagtutunggaling paksyon ng naghaharing uri upang pagpasyahan kung sino sa kanila ang mangingibabaw at kung papaano nilang pagsasaluhan ang pakinabang ng pampulitikang kapangyarihan.

Mga tungkulin ng rebolusyonaryong kilusan sa panahon ng eleksyon

Nananatiling sentral na tungkulin ng Partido Komunista, ng Bagong Hukbong Bayan at buong rebolusyonaryong kilusan na isulong ang armadong pakikibaka upang ibagsak ang imperyalistang dominasyon at ang makauring diktadura ng malalaking burgesyang kumprador at malalaking panginoong maylupa. Kung kaya't hindi ito maaaring tuwirang lumahok sa reaksyunaryong eleksyon.

Gayunpaman, sasamantalahin nito ang mga pagkakataong bubuksan ng eleksyon upang ibayong paigtingin ang rebolusyonaryong armadong pakikibaka, isulong ang mga pakikibakang masang anti-imperyalista, antipyudal at antipasista, higit na palakasin ang impluwensya ng rebolusyonaryong kilusan at palawakin ang pambansang nagkakaisang prente. Sa partikular, maaari itong makialam sa eleksyon sa pamamagitan ng mga paraang lihim at di pormal at makabuluhang impluwensyahan ang resulta nito na may layuning ihiwalay at biguin ang sagadsaring reaksyunaryong kandidato, manalo ang mga kandidatong progresibo at mapagkaibigan upang magamit bilang karagdagang larangan ng pakikibaka ang pagkilos sa loob ng reaksyunaryong parlamento.

ILANTAD ANG REAKSYUNARYONG KATANGIAN NG ELEKSYON. Kinakailangang ipakita sa masa na ang eleksyon ay isang pampulitikang instrumento na nasa kontrol ng mga reaksyunaryong naghaharing uri at ginagamit para sa pagpapatibay ng kanilang paghahari. Kailangang ilantad ang panlilinlang na sa pamamagitan ng eleksyon ay mayroong



demokratikong karapatan ang mamamayan na mamili ng mga tao sa gubyrno sa pamamagitan ng paglalantad sa iisang esensya ng malalaking partidong pampulitika na pawang maka-imperyalista at nagtataguyod sa interes ng malalaking burgesyang kumprador at panginoong maylupa.

Kailangang pawiin ang repormista at parlamentaristang ilusyon na makakamit ang pundamental na pagbabagong panlipunan sa pamamagitan ng eleksyon. Kailangang bigyang partikular na pansin ang paglalantad sa teorya ng ebolusyunismo na pinalalaganap ng mga kontra-rebolusyonaryong “ikatlong pwersa” na makakamit ang pagbabago sa dahan-dahang pagpapalakas ng impluwensya sa loob ng parlamento at burukrasya. Kailangang ilinaw ang sentral na halaga ng rebolusyonaryong armadong pakikibaka sa pagkamit ng tunay na pagbabago na hinahadlangan pangunahin ng reaksyunaryong armadong pwersa; at ang sekundaryo ngunit esensyal na importansya ng iba’t ibang anyo ng di armadong pakikibaka—at ang pagiging pangunahin ng pag-oorganisa at sama-samang pagkilos ng masa kumpara sa lahat ng anyo ng pakikibakang di armado.


Habang maaaring magkaroon ng iba’t ibang paraan ng lihim at di pormal na paghikayat at pagsuporta sa mga patriyotiko at progresibong indibidwal at partido sa kanilang paglahok sa halalan, kailangang magsikap ang Partido at mga rebolusyonaryong pwersa na ilinaw sa kanila at sa masang boboto ang magiging mga limitasyon ng gawain sa loob ng reaksyunaryong parlamento at burukrasya.

PAIGTINGIN ANG ARMADONG PAKIKIBAKA. Kinakailangang tuluy-tuloy na isulong ang rebolusyonaryong armadong pakikibaka at basagin ang ilusyon na umiiral ang matiwasay at demokratikong kaayusan sa harap ng malawak na pagpapahirap sa masa at pamamayani ng karahasan at kriminalidad sa iba't ibang antas ng estadong neokolonyal.

Kinakailangang tuluy-tuloy na paigtingin ang malalaki at maliliit na taktikal na opensiba laban sa AFP at PNP. Patuloy na sunggaban ang lahat ng pagkakataong magdulot ng mga sugat at bigwas laban sa mga reaksyunaryong armadong pwersa at palakasin ang Bagong Hukbong Bayan. Kinakailangang tuluy-tuloy na palawakin ang rebolusyonaryong baseng masa sa kanayunan at isulong ang mga pakikibakang antipyudal ng masang magsasaka.

Ang mga pusakal na kaaway ng bayan ay hindi dapat pabayaang mamayagpag na walang pananagutan sa kanilang mabibigat na krimen laban sa mamamayan. Sinupin at ilathala ang mga sakdal laban sa kanila. Labanan at wasakin ang kanilang pampulitika at armadong makinarya at kampanya na manatili o makaupo sa poder. Sa abot ng makakaya, isaka-tuparan ang pagparusa sa kanila.

Kailangang lalong sinupin at mas pala-wakin pa ang pagsasakatuparan ng pangungulekta ng kabayaran sa pahintulot na makapangampanya ang mga kandidato sa mga teritoryong nasa ilalim ng rebolusyonaryong kapangyarihang pampulitika. Sa ating karanasan, ang mga sinisingil ng ganitong kabayaran ay mas madalas na tumatalima kaysa lumalabag dito. Yaong lumalabag ay nararapat na gawaran ng angkop na parusa. Ang patakaran ng pagsingil ng kabayaranang ito ay maaari ring gamitin para itaguyod ang mga taktikal na alyansa.



Gamitin ang lahat ng pagkakataon na makakalap ng armas at iba pang tipo ng suporta para sa rebolusyonaryong armadong pakikibaka.

PALAKASIN ANG MGA PAKIKIBAKANG MASA AT PALAWAKIN ANG NAGKAKAISANG PRENTE. Nasa mahusay na pusisyon ang kilusang masa na mas sumulong pa at makabuluhang impluwensyahan ang mga pangunahing labanan sa pulitika sa labas at loob ng reaksyunaryong eleksyon at parlamento. Nakasalalay ito sa tuluy-tuloy na pagkilos ng masa sa lansangan at pagsusulong ng mga pakikibakang anti-imperyalista, antipyudal at antipasista.

Kinakailangang tuluy-tuloy na igiit ang mga hinaing ng mamamayan na nagbuklod sa kanila sa pag-aalsang EDSA 2. Sa pangunahin, kinakailangang tuluy-tuloy na igiit ang pag-aresto at pag-usig kay Estrada at sa kanyang mga pangunahing kasapakat laluna sa gitna ng mga maniobrang ligal at pampulitika upang iligtas si Estrada sa kaparusahan.

Kasabay nito, kailangang labanan ang mga anti-mamamayang patakaran at hakbangin ng rehimeng Macapagal-Arroyo at ipaglaban ang interes ng anakpawis kabilang na ang reporma sa lupa, karagdagang sahod, ang pagtigil sa pagtaas ng presyo ng langis at iba pa.

May iiral na malawak na puwang para sa gawaing alyansa dahil sa igit ng mga labanan sa panahon ng eleksyon at kahit pagkatapos nito. Kailangang gamitin ang mga puwang na ito mula sa lokal hanggang sa pambansang antas upang palaganapin ang panawagan para sa pagsasakatuparan ng adyenda ng mamamayan, lalong ihiwalay ang pinakareaksyunaryong mga kandidato at hadlangan ang kanilang pagpwesto sa poder at tulungan ang pagpwesto ng mga progresibo at mapagkaibigang kandidato.

Kailangang gamitin ang mga pagkakataon sa nagkakaisang prente upang lalong palawakin ang mga lihim at hayag na ugnay ng mga rebolusyonaryong pwersa at pagsilbihin ito sa ibayong pagpapalawak ng mga pagkakataon para sa pag-oorganisa at pagpapakilos ng masa. Kailangang gamitin ang mga puwang na binubuksan ng halalan upang maisakatuparan ito sa pinakamabilis na paraan. **AB**

Lacson: Berdugo, trapo

“Kinasusuklanan ko ang pulitika. At mas kinasusuklanan ko ang mga pulitiko”.

Napilitan si Gen. Panfilo Lacson na kainin ang mga sinambit niyang salitang ito nang patalsikin siya sa kapangyarihan bilang hepe ng pulisya at ng Presidential Anti-Organized Crime Task Force (PAOCTF) kasabay ng pagbagsak ng kanyang amo na si Joseph Estrada. Isa ngayon si Lacson sa mga dating galamay ni Estrada na pilit na bumabalik sa poder at kumakandidato sa pagkasenador sa darating na halalan sa Mayo.

Subalit hindi lamang ang pagkahayok sa kapangyarihan ang motibo ni Lacson sa pagtakbo. Suportado siya ng salapi ni Eduardo “Danding” Cojuangco, na nag-aalaga o nagpapatakbo ng mga pulitiko na magbibigay-proteksyon sa kanyang mga pampulitika at pang-ekonomyang interes sa ilalim ng anumang rehimen. Higit sa lahat, isang maaasahang tuta ng imperyalismong US si Lacson.

Duguan ang mga kamay ng kandidatong si Lacson. Habang kahalubilo niya sa entablado ang mga kapwa niyang bulok na labi ng pangkating Estrada, kailangang puspusang tutulan ang kanyang pagkakandidato, ilantad ang kanyang mga krimen at ang naging papel niya sa ilalim ng rehimeng Estrada, laluna sa mga huling buwan nito at huwag siyang hayaang ibayong makapanlinlang sa mamamayan.

Sariwa pa sa alaala ang karumal-dumal na pambobomba sa limang magkakaibang lugar sa Metro Manila noong Disyembre 30 na pakana nina Estrada at Danding Cojuangco at isinagawa ng mga tauhan ni Lacson. Pumatay ito ng 26 at nakasugat ng mahigit 100 inosenteng mamamayan. Sa kabila ng ilampung namatay at nabalda rito, bigo ang pambobomba na ilihis ang atensyon ng mamamayan mula sa mga eksplosibong impormasyong inilantad sa *impeachment trial* ni Estrada.

Bago nito, ipinadukot at ipinaligpit ni Lacson ang *public relations practitioner* na si Salvador “Bubby” Dacer noong Nobyembre upang pigilin ito sa napipintong pagbubunyag ng papel ni Estrada

sa iskandalo sa BW Resources. Sa kasalukuyan, di bababa sa pitong tauhan ng PAOCTF ang natuklasang sangkot sa pagdukot at pagsalbeyds kay Dacer.

Nang ianunsyo ni Lacson ang kanyang kandidatura nitong Pebrero, sunud-sunod na pangangidnap at panghoholdap sa bangko ang isinagawa ng mga galamay ni Lacson sa Kuratong Baleleng at iba pang kriminal na sindikato upang mangalap ng pondo para sa kanyang kampanya, maghasik ng takot at gamitin ito upang makapagpropaganda na kailangang maibalik si Lacson sa poder para mapanatili ang “kaayusan at kapayapaan”.

Nabunyang din kamakailan ang patuloy na paggamit ni Lacson sa mga elemento ng Philippine National Police bilang mga eskort at badigard sa kanyang pangangampanya. Limang *regional director* ng PNP sa Kabisayaan at Mindanao ang sangkot sa pagbibigay ng “VIP treatment” kay Lacson nang mangampanya ito sa kani-kanilang mga lugar.

At kamakailan lamang, ibinunyang ni Gov. Luis “Chavit” Singson na nang tinangka ng rehimeng Estrada na gawing ligal ang hweteng, humingi si Lacson ng 2.5% ng daan-daan milyong kabuuang kita ng mga opereytor ng hweteng. Tulad ng kanyang among si Estrada, gustong solohin ni Lacson ang pamamahagi ng “protection money” sa mga *regional director* ng PNP upang makatiyak siya sa katapatan ng huli at tumatag ang kanyang base sa loob ng pulisya.

Ito lamang ang mga pinakahuling krimen ni Lacson. Tiyak na marami pang mabubunyang hinggil sa kanya habang umiinit ang labanan sa reaksyunaryong pulitika.

Ang bulok at pasistang si Lacson ay bagay na kamuhian at ibasura kasabay ng bumagsak na rehimeng Estrada. Isinisigaw ng daan-daang inosenteng mamamayang naging biktima ng kanyang mga krimen na dapat na siyang kasuhan at parusahan. **AB**



Ang patuloy na pamamayagpag ng mga pamilya at kroni ni Joseph Estrada

Mahigit nang isang buwan ang lumipas matapos ang EDSA 2 na nagpatalsik kay Joseph Estrada ngunit hanggang ngayo'y ni hindi pa nalilitis si Estrada at ang kanyang pinakamalalaking kroni. Sa katunayan, patuloy na namamayagpag ang mga ito dulot ng kainutilan ng rehimeng

Macapagal-Arroyo na mapagpasyang usigin ang mga kaso laban sa kanila. Masahol pa, nakikipag-areglo ang kasalukuyang rehimen kay Estrada at mga tauhan nito kapalit ng suportang ligal at pinansyal na lubos nitong kinakailangan laluna sa parating na eleksyon.

Bago pa man mapatalsik si Joseph Estrada noong Enero 20, abalang-abala na ang kanyang mga kroni sa pakikipagtawaran sa kampo ni Macapagal-Arroyo. Matapos magpasasa sa kabang bayan, isinalba ang kani-kanilang mga sarili at ari-arian sa pamamagitan ng "pagbawi" ng kanilang suporta kay Estrada. Tanda ng kabulukang likas sa reaksyunaryong pulitika, sila ngayo'y hinahayaan lamang o kinakandili pa nga ng rehimeng Macapagal-Arroyo.

Pinakagarapal ang ginawang "pagbalimbing" ni **EDUARDO "DANDING" COJUANGCO** at **LUCIO TAN**, dalawa sa may pinakamalaking pakinabang sa rehimeng Estrada, at ang walang kakurap-kurap na pagtanggap sa kanila ni Macapagal-Arroyo. Matapos ang pagkalas ng partidong Nationalist People's Coalition ni Danding sa alyansa ni Estrada at ang pagpapahayag nito ng suporta kay Macapagal-Arroyo habang nagbabanta ng destabilisasyon, iniatras ng



bagong rehimen ang bantang pagpapalit kay Danding bilang tagapangulo ng San Miguel Corporation (SMC).

Matatandaang ibinigay ni Estrada ang *chairmanship* ng SMC kay Danding noong 1998 gamit ang sekwestradong mga sapi.

Dagdag dito, inihain ni Macapagal-Arroyo kay Danding at ibang panginoong maylupa sa Philippine Coconut Producers Federation o Cocofed ang mahigit 95% sekwestradong sapi sa United Coconut Planters Bank (UCPB). Ito ay sa pamamagitan ng desisyon ng Sandiganbayan na nagdeklarang pribadong pag-aari ang naturang mga sapi. Sa nakaraang 15 taon, ang naturang mga sapi ay itinuring na pampublikong pondo kung kaya't hawak ito ng Philippine Commission on Good Government. Itinatagda ng desisyong ito ng Sandiganbayan ang maaaring mangyari sa katulad na sitwasyon ng 27% sekwestradong sapi sa SMC. Inaangkin ni Danding ang 37.6% sa kabuuang sekwestradong sapi sa UCPB at buong 27% sa SMC.

Gayundin, matapos lumabas si Lucio Tan bilang "kaibigan" ng kampong Macapagal-Arroyo, inihayag ng bagong rehimen ang kahandaan nitong aregluhin ang kanyang kaso ng di pagbabayad ng P25.27 bilyong buwis. Ipinagpaliban din nito, sa

pamamagitan ng Bangko Sentral, ang pagbabayad sa P25-bilyong pautang na ipinagkaloob nito sa Philippine National Bank (PNB) noong Oktubre 2000. Pumayag din ang BSP na bayaran ni Tan sa ibang paraan (hindi sa anyong salapi) ang P15 bilyon sa inutang nito. Dumanas ang PNB, na pag-aari ni Tan, ng mabibigat na *withdrawal* matapos mabunyag ang mga kriminal na aktibidad ni Estrada noong nakaraang taon. Higit sa lahat, binigyang-katiyakan ng rehimeng Macapagal-Arroyo ang patuloy na pagkabuhay at paglago ng imperyo ni Tan at kanyang mga kasapakat sa ilalim ng kanyang rehimen.

Ang iba pang mga kroni na nagsulputan at nag-alok ng “kooperasyon” sa bagong rehimen ay agad ding tinanggap ng rehimeng Macapagal-Arroyo. Ito ay sa kabila ng mga pahayag ng mga abugadong umusig kay Estrada na sobra pa sa sapat ang pinanghahawakang ebidensya ng gubyerno upang hatulan at ibilanggo si Estrada sa mahigit pitong kaso ng pandarambong.

MARK JIMENEZ: Binansagang “henyo” ni Estrada sa larangan ng negosyo, kasabwat si Jimenez sa mga kasunduang gumamit ng pampublikong pondo ng SSS at GSIS sa mga pribadong transaksyon ng pinaborang mga korporasyon. Ilan sa mga kasunduang inareglo niya ay ang pagsasanib ng Philippine Commercial Incorporated Bank (PCIB) at Equitable Bank at ng Philippine Long Distance Telephone Co. (PLDT) at First Pacific kung saan kumita sila ni Estrada ng limpak-limpak na salapi bilang suhol at komisyon. Bahagi rin siya sa mga unang nagmanipula ng mga sapi ng Best World Resources, na pagmamay-ari ng isa pang kroni na si Dante Tan. Labas sa kanyang pagkakasangkot sa mga kaso dito sa Pilipinas, nahaharap din siya sa mga kaso ng pagbibigay ng ilegal na kontribusyon sa Democratic Party, hindi pagbabayad ng buwis at *mail fraud* sa US.

Nagprisinta si Jimenez sa mga tagausig noong nililitis si Estrada sa senado. Tinanggap siya bilang testigo ng estado ng Department of Justice at

kasalukuyang nasa Witness Protection Program nito. Sa gayon, ligtas siya sa mga kasong isinampa sa kanya bilang kasabwat sa mga krimen ni Estrada. Dagdag dito, pansamantalang ligtas din siya sa kanyang mga kaso sa US dahil mananatili siya sa Pilipinas hangga’t di natatapos ang paglilitis sa mga kaso ni Estrada. Sa kasalukuya’y tumatakbo siya bilang kongresman ng ikaanim na distrito ng Maynila.

JAIME DICHAVES: Lumabas ang pangalang Dichaves sa paglilitis kay Estrada nang akuin niya ang P3.2-bilyon *bank account* na nakapangalan kay Jose Velarde (isang alyas ni Estrada) sa PCI-Equitable Bank. Si Dichaves ay isa sa mga direktor ng Belle Corporation na sangkot sa *jai alai* at naglustay ng pondo ng SSS at GSIS sa iba’t ibang transaksyon nito. Kasosyo siya ni Laarni Enriquez, paboritong kabit ni Estrada, sa ibang mga negosyo nito at siya rin ang tagakolekta ng “tong” para kay Estrada mula sa National Telecommunications Commission. Mismong ang Mala-kanyang ang nagpangalan sa kanya bilang pangalawang pinakamalaking ismagler sa Subic Freeport.

Inaalok ni Justice Secretary Hernani Perez si Dichavez na maging testigo ng estado kapalit ng paglibre sa kanya sa isang kaso ng pandarambong laban kay Estrada. Ang tanging hiningi ni Perez ay ang lokasyon ng iba pang *bank account* ni Estrada at ang mansyong “Boracay”. Kasalukuyang nagtatago sa US si Dichaves at ang kanyang pamilya.

CHARLIE “ATONG” ANG: Si Ang, na pinakamalapit na kasugalan ni Estrada, ang namamahala sa mga kriminal na sindikato ni Estrada na sangkot sa ilegal na sugal. Binigyan siya ni Estrada ng mga kontrata sa Philippine Amusement and Gaming Corporation (Pagcor). Ginawa pa siyang konsultant ng Pagcor sa operasyon nito sa *jai alai*.

Tulad kay Jimenez, nagprisinta rin si Ang bilang testigo kapalit ng pagtanggali ng kanyang pangalan sa mga kasong pandarambong laban kay Estrada. Bagamat di pa hayagang pumapayag ang




Kailangang tumayo ang usapang pangkapayapaan sa pundasyon ng mga nakaraang kasunduan

Kontra sa walang patumanggang todo-digma ng ibinagsak na rehimeng Estrada, idinidiin ngayon ng rehimeng Macapagal-Arroyo ang paggamit sa usapang pangkapayapaan sa pagharap sa rebolusyonaryong kilusan. Upang suhayan ito, idineklara ni Macapagal-Arroyo ang “upisyal na pagwawakas” ng patakarang *all-out war* laban sa Moro Islamic Liberation Front at inianunsyo ang pagpapalaya ng 73 sa 254 bilanggong pulitikal.

Nitong Pebrero 9, hinirang si dating Justice Sec. Silvestre Bello III kasama ang apat na iba pa sa panel na makikipagnegosasyon sa National Democratic Front of the Philippines (NDFP).

Sa panig ng NDFP, muling hinirang si Kasamang Luis Jalandoni bilang pinuno ng panel nito na makikipag-usap sa Gubyerno ng Republika ng Pilipinas (GRP). Katulad ng ipinakita nito sa nakaraan, nakahanda ang NDFP na harapin ang GRP upang pag-usapan ang mga isyu na nasa ugat ng armadong tunggalian. Ang usapang pangkapayapaan ay karagdagang larangan ng pakikibaka na segundaryo sa armadong pakikibaka at sa rebolusyonaryong kilusang masa. Lumalahok dito ang rebolusyonaryong kilusan nang walang ilusyong malulutas ang mga saligang suliranin ng



mamamayan o na sinsero sa kapayapaan ang GRP.

Sa nakaraan, ang GRP ang naging pinakamalaking hadlang sa pagsulong ng usapang pangkapayapaan. Sa pilit nitong pagtanggiling kilanlin ang NDFP bilang kapantay sa usapang pangkapayapaan, sinabotahe nito ang mga nabuong kasunduan na siyang dahilan ng paulit-ulit na pagbagsak ng usapan.

Panindigan ang mga nakaraang kasunduan!

Lampas sa pagpapalaya ng mga bilanggong pulitikal o sa pag-aanunsyo ng pagwawakas ng patakarang *all-out war* ang dapat gawin ng rehimeng Macapagal-Arroyo upang muling simulan ang usapang pangkapayapaan. Obligasyon nitong kilalanin ang mga nauna nang kasunduan sa pagitan

◀ bagong rehimen sa kundisyon ni Ang, kinuha na nito ang kanyang pahayag sa Hongkong kung saan siya nakabase ngayon.

Labas sa tatlong ito, nag-alok din ng testimonya si Edward Serapio, abugado ni Estrada,

at ang kabit ni Estrada na si Rowena Lopez. Si Serapio ay umaktong “tagapamagitan” ni Estrada at ng iba’t ibang kriminal na sindikatong kinakandili nito. Dagdag sa listahan ng mga kroni ay sina William Gatchalian, Jacinto Ng Sr, Lucio Lao Co,

Jose Luis Yulo, Dante Tan at Luis “Baby” Asistio na pawang mga kasabwat ni Estrada sa pandarambong ng kabang bayan ngunit sa kasalukuyan ay buong-layang nakagagalaw at nakapamumuhay sa loob ng bansa. **AB**

ng GRP at NDFP. Malinaw ang pagkakasunud-sunod ng adyenda na itinakda sa The Hague Joint Declaration na nilagdaan ng magkabilang panig noong Setyembre 1, 1992. Nilaman ng kasunduang ito ang layunin, balangkas at substantibong adyenda sa usapang pangkapayapaan at ang mga prinsipyong katanggap-tanggap sa magkabilang panig na magiging gabay dito.


Pinagtibay na ng mga prinsipal ng magkabilang panig ang Comprehensive Agreement on Respect for Human Rights and International Humanitarian Law o CARHRIHL. Ang iba pang adyenda, ayon sa pagkakasunud-sunod, ay ang repormang sosyo-ekonomiko; repormang konstitusyunal at elektoral; at ang dispusisyon ng mga pwersa.

Matamang tumalima ang NDFP sa balangkas na itinakda ng magkasamang kasunduang ito. Wala itong ibang kundisyong ipinapataw sa GRP sa usapan at sa katunayan, patuloy ito sa pagsasagawa ng mga aksyon ng kabutihang-loob upang patunayan ang kaseryosohan sa negosasyon gaya ng pagpapalaya sa mga bihag ng digma. Taliwas dito, garapal ang rekord ng rehimeng Ramos at Estrada sa paglabag dito. Bukod sa paggigiit na ang konstitusyon ng GRP ang gawing balangkas ng pag-uusap kontra sa isinasaad ng The Hague Joint Declaration, nais pa nitong pasukuin ang NDFP at iabanduna nito ang armadong pakikibaka.

Napagkasunduan din ng NDFP at GRP noong Hunyo 14, 1994 sa Breukelen Joint Declaration na sa isang nyutral na bansa idaraos ang pormal na negosasyon. Pinanindigan ito ng NDFP at hindi ito natangay sa panlilinlang ng mga nagdaang rehimen sa panukalang sa Maynila idaos ang usapan; sa lokalisdong usapang pangkapayapaan at tigil-putukan.

Nagbigay ng proteksyon sa mga kinatawan ng NDFP at GRP na kalahok sa negosasyon ang Joint Agreement on Safety and Immunity Guarantees (JASIG) na nilagdaan noong Pebrero 24, 1995 habang tiniyak naman ng Joint Agreement on the Formation, Sequence and Operationalization of the Reciprocal Working Committees (Hunyo 26, 1995) ang maayos na pag-uusap sa unang

substantibong adyenda—ang usapin ng karapatang-tao at internasyunal na makataong batas.



Itaguyod ang CARHRIHL!

Naging dagdag na sandata ng sambayanang Pilipino ang CARHRIHL na nilagdaan ng *negotiating panel* ng magkabilang panig noong Marso 16, 1998. Si Kasamang Mariano Orosa ang lumagda bilang prinsipal ng NDFP noong Abril 10, 1998 samantalang Agosto 7, 1998 ito nilagdaan ni Estrada. Buung-buo at walang pagtatangi itong ipinatutupad at patuloy na ipatutupad ng lahat ng rebolusyonaryong pwersa. Makasaysayang dokumento ito dahil tinugunan nito ang aspirasyon ng sambayanang Pilipino na igalang ang kanilang karapatan at testamento ito ng pag-amin ng reaksyunaryong estado sa usapin ng malawakang paglabag sa mga karapatang-tao. Kinumpirma rin ng dokumentong ito ang kapantay na katayuan ng NDFP sa GRP.

Nilaman ng CARHRIHL ang buong saklaw ng karapatang-tao. Ginarantiyahan nito ang karapatan ng lahat ng demokratikong uri at sektor sa lipunan laban sa pagsasamantala at pang-aapi. Naglaman din ito ng mga karagdagang probisyon sa internasyunal na makataong batas sa digmaan at nagtaglay ng mas mataas na pamantayan kaysa sa Protocol I ng Geneva Conventions ng 1949.

Itinalaga ng NDFP si Kasamang Fidel Agcaoili bilang pinuno ng *joint monitoring committee* na susing bahagi at malinaw na pangangailangan sa pagpapatupad ng CARHRIHL. Samantala, hindi na nakabuo ng katulad na komite ang rehimeng Estrada. Sa halip na itaguyod ang pinasok na kasunduan, binalewala ito at gumawa ng sunud-sunod na paglabag, pagmamaniobra at pananabotahe na naging daan para sa tuluyang pagbagsak ng usapang pangkayapaan.

Susulong lamang ang usapang pangkapayapaan kung magkakaroon ng pagkilala ang bagong rehimeng Macapagal-Arroyo sa mga kasunduang ito laluna sa pagpapatupad ng CARHRIHL. Sa nakaraan ang mga nasabing kasunduan ay ibinasura ng mga nagdaang rehimen upang pagtakpan ang kawalan ng matinong adyenda sa usapan. ^{AB}

Palayain ang lahat ng mga bilanggong pulitikal!



Patuloy na umaalingawngaw ang panawagan para sa kagyat na pagpapalaya ng rehimeng Macapagal-Arroyo sa lahat ng 254 bilanggong pulitikal nang walang anumang kundisyon o kapalit. Dapat tugunan ng bagong-luklok na rehimen ang mahigpit na paggigiit para rito ng mga kamag-anak ng mga bilanggong pulitikal, ng mga organisasyong pangkarapatang-tao, ng simbahan at ng buong sambayanan.

Ang mga bilanggong pulitikal ay biktima ng walang-patumanggang kontra-rebolusyonaryong digma na inilulunsad ng reaksyunaryong estado. Sila ay dinakip at ipiniit dahil sa kanilang pakikipaglaban para sa interes ng masang anakpawis. Sinampahan sila ng mga kasong kriminal upang itangging pulitikal ang kanilang mga kaso. Ang kanilang patuloy na pagkapiit ay paglabag sa mga karapatang sibil ng mga bilanggong pulitikal.

SA KABILA NG MAHIGPIT NA PAGTUTOL NG imperyalismong US at ng militar, laluna ng Executive Secretary na si Gen. Renato de Villa, napilitan si Macapagal-Arroyo na ipag-utos nitong huling linggo ng Pebrero ang pagpapalaya sa mga bilanggong pulitikal dulot ng mariing paggigiit ng malawak na seksyon ng lipunan. Subalit di tulad ng kagyat na pagpapalaya ni Corazon Aquino

noong 1986 sa mayorya ng mga bilanggong pulitikal ng batas militar, ang kautusan ni Arroyo ay sumaklaw sa 73 lamang.

Dahil sa puspusang pakikipaglaban para rito ng mga tagapagtaguyod ng karapatang-tao ay naaprubahan na ng dating Department of Justice (DOJ) ang pagpapalaya sa may 50 bilanggong pulitikal bago pa man mapatalsik si Estrada. Dinagdagan ito ng bagong rehimen ng 27 pa subalit pinatawan naman ng napakaraming kundisyon ang pagpapalaya sa kanila. Masahol pa, aroganteng ipinatanggal ni De Villa sa listahan ang humigit-kumulang 30, kabilang sina Leoncio Pitao, kilalang pinuno ng Bagong Hukbong Bayan sa Hilagang Mindanao, at Lorna Baba, isang taong-simbahan.

Gayundin, tulad ng mga nagdaang rehimen, tinanggihan ni Macapagal-Arroyo na palayain sina Donato Continente at Juanito Itaas, alinsunod sa panghihimasok ng imperyalismong US. Ito'y kahit sina Continente at Itaas, na pinagbibintangang pumatay sa Amerikanong si Lt. James Rowe noong 1989, ay pinagkalooban na ng *parole* ng mga reaksyunaryong korte.

Ang patuloy na pagbibimbin sa mga bilanggong pulitikal ay isang malaking inhustisya. Lalong malaking inhustisya ang ginagawa ng rehimeng Macapagal-Arroyo na habang nakabilanggo ang mga detenidong pulitikal ►

◄ Sa panig ng NDFP, pinanantili nito ang sariling pampulitikang integridad sa pamamagitan ng pagtatanggol at pagtataguyod ng karapatan ng mamamayan at matibay na pagkapit sa armadong pakikibaka bilang

tanging solusyon sa pagkakamit ng tunay at pangmatagalang kapayapaan.

Ang usapang pangkapayapaan ay dagdag na larangan ng pakikibaka upang itaguyod ang interes ng masa. Bibiguin

ng NDFP ang anumang pagtangka ng reaksyunaryong estado na idiskaril ang usapan sa pamamagitan man ng tolong-largang pasistang pananalakay sa mamamayan at rebolusyonaryong kilusan o sa panlilinlang. **AB**

Ang papet na rehimeng Macapagal (1962-65)

Si Diosdado Macapagal, ang yumaong ama at idineklarang modelo ng anak niyang si Gloria Macapagal-Arroyo, ay masugid na tagapagtaguyod ng imperyalistang dominasyon at pagsasamantala sa mamamayang Pilipino. Sa ilalim ng kanyang gubyerno (1962-65) ipinatupad ang ilan sa pinakamasasahol na patakarang nagbukas ng ekonomya sa walang rendang pandarambong ng mga dayuhang monopolyo kapitalista.

Ang buhay at rekord ni Macapagal ay buhay at rekord ng pagseserbisyo sa imperyalismong US. Unang-unang nagtrabaho si Macapagal sa pinakamalaking Amerikanong upisina ng mga abugado (Ross, Lawrence, Selph and Carrascoso), at pagkatapos ay sa Department of Foreign Affairs. Bago tumakbo at manalo bilang kongresista noong 1948, nagsilbi muna siya bilang pangalawang kalihim ng embahada ng Pilipinas sa Washington D.C. Mula 1950-53, pinamunuan ni Macapagal ang House Committee on Foreign Affairs at itinalaga siya bilang delegado sa mga kumperensyang panrehiyon at pandaigdig na itinaguyod ng imperyalismong US. Kasama siya sa pagbalangkas ng US-Philippine Mutual Defense Treaty at paglagda sa Japanese Peace Treaty noong 1951. Kabilang din si Macapagal



sa mga lumagda sa makadayuhan at mapang-aliping Laurel-Langley Agreement. Ang mga ito'y ilan sa mga pinakamasahol na di pantay na kasunduang pinasok ng papet na republika sa kasaysayan nito.

Dahil pinondohan ng imperyalismong US ang kandidatura ni Macapagal para sa pagkapresidente noong 1961, natalo ang noo'y nanunungkulang pangulo na si Carlos P. Garcia kahit pa ginastos ng huli ang salapi at rekursong gobyerno para sa sariling kampanya. Isang malaking kahungkagang

◀ ay patuloy nitong pinahihintulutang makapamayagpag sa buong kapuluan ang mga sagad-sagarang kriminal gaya nina Joseph Estrada at Panfilo Lacson, tinatanawan ng utang-na-loob ang mga berdugong gaya ni Angelo Reyes, at kinakaibiga't niyayakap ang mga mapagsamantala't mapang-api gaya

nina Danding Cojuangco at Lucio Tan.

Para sa mga detenidong pulitikal, kanilang mga kamag-anak at mga tagapagtaguyod ng karapatang-tao, tuluy-tuloy ang pakikibaka hanggang mapalaya ang lahat ng bilanggong pulitikal. Higit kailanma'y lumilina ang bawat pag-usad tungo sa

mithing paglaya ay makakamit lamang sa pamamagitan ng walang-pagod na pakikipaglaban para rito. Isang bagay pa ang tiyak: hangga't hindi nababago ang naghaharing sistemang tumuturing sa rebolusyonaryong paninindigan bilang krimen, magpapatuloy ang pakikibaka kahit pa nakalabas na sa selda. **AB**

tumakbo si Macapagal sa plataporma ng “malayang inisyatiba” at “desentralisasyon”. Sa aktwal, ang pagpinansya ng US sa mga partidong nagdala kay Macapagal ay kapalit ng masugid na pagsunod ng mga ito sa mga imperyalistang dikta sa pamamagitan ng World Bank at International Monetary Fund at mga Amerikanong “tagapayo” ng papet na rehimen.

Sa ilalim ng rehimeng macapagal, nagpatuloy sa lalong pinairal ang mga makadayuhan at kontra-mamamayang patakaran. Sumusunod ang ilan sa mga ito:

DEKONTROL. Pagkaluklok na pagkaluklok sa poder, inalis ni Macapagal ang kontrol at mga restriksyon sa operasyon ng mga dayuhang korporasyon sa Pilipinas. Pinahintulutan ang malayang pagtatambak ng mga dayuhang produkto na inaangkat sa mataas na presyo at binaklas ang mga restriksyon sa pamumuhunan. Sinamantala ito’t pinakinabangan ng malalaking burgesyang kumprador at panginoong maylupa, na todo-largang nag-eksport ng hilaw na materyales habang buong-bwelong nag-aangkat ng mga yaring kalakal.

DEBALWASYON. Bunga ng dekontrol, sumirit ang gastos sa pag-import sa mga yaring kalakal, hilaw na materyales, pyesa, panggatong at iba pa mula sa US.

Di naglao’y naubos ang reserbang dolyar ng Pilipinas at napilitan ang rehimeng Macapagal na ibaba sa P3.90 mula P2 ang halaga ng piso kontra sa dolyar. Ang Pilipinas ay naobligang tumanggap ng dambuhalang “stabilization fund” mula sa mga bangko ng US sa Pilipinas. Kasabay nito, sumirit ang presyo ng mga bilingin, lalong lumiit ang maliit nang sahod ng mga manggagawa at lalong bumagsak ang mababang antas ng kabuhayan ng mamamayan.

PAGKONTROL NG MGA DAYUHANG MAMUMUHUNAN SA LOKAL NA PONDO. Binuo ang Program Implementation Agency (PIA) at iba pang ahensya sa pagpapautang upang mapadali ang paghiram ng mga dayuhang

mamumuhunan sa mga lokal na bangko. Dahil may paghihigpit sa paglalabas ng dolyar mula sa US, nagawang palakihin ng mga kumpanyang US ang kanilang kapitalisasyon sa Pilipinas sa pamamagitan ng paghuthot sa pondong naka-impok sa mga lokal na bangko na kontrolado ng US.

PAGTATAGUYOD SA PATAKARANG PANLABAS NG US. Sinuportahan ni Macapagal ang Maphilindo (Malaysia, Philippines, Indonesia) upang itaguyod ang pagkilala at pagsuporta sa “Malaysia” na binuo ng US; gayundin upang ipitin ang gubyernong Sukarno ng Indonesia at bigyan ng mga konsesyon ang mga korporasyong US sa Malaya at North Kalimantan. Upang makapagpanggap na

nagtataguyod ng independyenteng patakarang panlabas, ipinabasura ni Macapagal ang US-RP Treaty of General Relations habang katunaya’y nanatili ang iba pang di pantay na kasunduang nagpapalawig sa tratadong ito.

PAKIKIPAGKUTSABAHAN SA US PARA AMYENDAHAN ANG US-RP MILITARY BASES AGREEMENT. Bagamat hindi ito napagtibay sa senado, sumangayon si Macapagal na palawakin ang hurisdiksyon ng kumander ng base ng US sa Pilipinas.

PAGPAPADALA NG MGA TROPANG PILIPINO SA GERANG AGRESYON NG US LABAN SA MAMAMAYANG VIETNAMESE. Ikinampanya ng gubyernong Macapagal ang pagsuporta sa digmang agresyon ng US laban sa Vietnam. Ang panawagan ni Macapagal na magpadala ng mga tropa sa Vietnam ay sinuportahan ng mga Pilipinong ahente ng Central Intelligence Agency na may interes sa negosyo sa gerang ito.

PAGTAGUYOD SA ASIAN DEVELOPMENT BANK (ADB). Inisponsor ni Macapagal ang kumperensyang nagtaguyod sa ADB at inialok pang itayo sa Maynila ang punong tanggapan nito, bilang pagtataguyod sa imperyalistang kutsabahan ng US at Japan; at pagtataguyod sa Japan bilang panrehiyong pinunong papet ng US sa Asia. Daluyan ang ADB ng mga imperyalistang patakarang nakadisensyo para panatilihi tagasuplay ng murang hilaw na



materyales sa US at Japan ang Pilipinas at iba pang bansa sa Asia. Panahon ni Macapagal nang tumaas sa 20% ang parte ng Japan sa kalakalang panlabas ng Pilipinas.

PAGPALIT NG ARAW NG KALAYAAN SA HUNYO 12 MULA SA HULYO 4. Layunin nitong pagtakpan ang hayagang pagkamakaimperyalista ni Macapagal. Ang kasinungalingang “ibinigay” ng US ang kalayaan ng Pilipinas, ay pinalitan ng sing-aroganteng kasinungalingang “ibinalik” ito ng US.

AGRICULTURAL LAND REFORM CODE. Idineklara ni Macapagal na “kontra sa patakarang pampubliko” ang sistema ng pakikisamá at partihaan at nangakong palalayain ang masang kasamá mula sa sistemang ito. Ang totoo, ang ginarantiyahan ni Macapagal ay ang mga panginoong maylupa na bibigyan pa ng “makatwirang bayad” ng gubyrerno para sa lupang babawiin mula sa kanila. Dagdag pa, ang presyo ng lupa para sa redistribusyon ay lagpas sa kayang bayaran ng “benepisyaryong” mga magsasaka. Hindi pinalaya, bagkus ay inilagay lamang sa panibagong kaayusan sa partihaan, ang mga kasamá.

ANG PAGPAPAKAPAPET NG REHIMEN SA imperyalismo at pagtataguyod nito sa interes ng malalaking dayuhan at lokal na kapitalista at reaksyunaryo ang siyang nagpatampok sa pamahalaan ni Diosdado Macapagal. Dahil dito, siya ay pinuri ng mga reaksyunaryo. Dahil din dito, siya at ang kontra-mamamayang sistemang pinalago niya ay kinamuhian at nilabanan ng masa ng sambayanang Pilipino.

Ang buong-pagmamalaking pagturing ng rehimeng Macapagal-Arroyo sa rehimeng Macapagal bilang huwaran ay bagay na ikinatutuwa ng imperyalismo; at hindi dahilan upang ipagdiwang ng mamamayan. **AB**

Balita mula sa rehiyon ng Cagayan Valley



Mahigit 500 pamilya sa Isabela nakinabang sa rebolusyong agraryo

SA LARANGANG BENITO TESORIO SA ISABELA, mahigit 500 pamilya ang nabeneplisyuhan nang magbunga ang panimulang sikad ng kampanya sa rebolusyong agraryo ng Bagong Hukbong Bayan. Sa buong rehiyon ng Cagayan Valley, mahigit 1,000 pamilya na maralita at mababang panggitnang magsasaka ang nakinabang na rin sa iba't ibang pakikibakang antipyudal nitong nakaraang taon.

PAGGIIT NG KARAPATAN SA LUPA

Sa isang baryo na saklaw ng larangan, militanteng iginiit ng mga magsasaka ang karapatan nilang bungkalin ang lupang dati na nilang sinasaka pagkatapos itong agawin ng reaksyunaryong gubyrerno, ideklarang lupaing pampubliko at patamnan ng *gmelina*. Ginawa ito ng gubyrerno sa kabila ng kawalan o kakulangan ng lupa na maaring bungkalin ng taumbaryo.

Noong Pebrero 2000, “binawi” ang lupa ng mga tunay na nagmamay-ari—ang mga maralitang magsasaka na matagal nang nagpaunlad nito. Mahigit 20 pamilya

ang kumilos. Dahil organisado sila, nagkaroon sila ng kakayahang ilaban ang kanilang karapatan at ipagtanggol ang matagumpay nilang pagkilos.

Sa isa pang baryo, naibaba ng mga magsasaka ang upa sa lupa sa 1/4 neto mula 1/3 *gross*. Ito ay pagkatapos na makipag-usap at makipagkasundo sa pinag-uupahan nila na mayamang magsasaka.

PAGPAPATAAS NG SAHOD

Sa kampanya para itaas ang sahod ng mga manggagawang bukid nakamit ang pinakamalaking tagumpay. Mahigit 480 pamilya ng batayang masa sa tatlong baryo ang nakinabang. Malaking porsyento ng populasyon sa mga baryong ito ang kasapi ng mga organisasyong masa. Nakapaloob naman sa selyula ng mga panggitnang pwersa ang ilang kagawad ng Sangguniang Barangay.

Sa isang baryo, naitaas ang sahod mula P70 tungong P80 para sa pagtanim at pag-aani. Mas mataas naman ang nakamit sa pag-aararo, pagtatabas, at *panaglimbang*. Sinimulan itong ikampanya ng mga organisadong magsasaka sa mga kasamahan nilang manggagawang-bukid sa pamamagitan ng pagpapapirma ng petisyon para itaas ang sahod. Iniharap nila ang petisyon sa Barangay Assembly at sinuportahan ito ng mga kagawad ng Sangguniang Barangay.

Sa isa pang baryo, iginiit din ng masa ang kahilingan nila sa Barangay Assembly. Dahil naliitan sa mungkahi ng Barangay Council na P5.00 na

pagtaas ng sahod, ipinaglaban nila ang mas mataas na sahod sa mga indibidwal na umuupa ng lakas-paggawa. Katulad ng sa naunang baryo, naitaas ang sahod mula P70 tungong P80 (sa pagtanim at pag-aani) sa dalawang purok.

Nakamit ang pinakamalaking pagtaas ng sahod sa ikatlong baryo. Pinagbotohan ng Barangay Assembly ang pagpapataas nito mula P70 tungong P100 (para pagtanim at pag-aani rin). Mas mataas naman ang nakamit para sa pag-aararo at pagtatabas.

LUMALAWAK NA PAGLABAN

Bukod sa mga matagumpay na kampanya, kasalukuyang isinusulong ang petisyon para sa pagpapababa ng interes sa pautang, pagpapataas ng presyo ng produkto ng saging at pagpapabalik sa mga maralitang nakikisakang pinaalis ng mga asendero.

Pangunahing nakatutok ang mga kampanya sa rebolusyonaryong reporma sa lupa sa hakbang-hakbang na pagpapahina hanggang maibagsak ang paghahari ng malalaking panginoong maylupa sa kanayunan.

Sa pamamagitan ng mga militanteng pakikibakang masa, hakbang-hakbang na lumalakas ang kapangyarihang pampulitika ng mga magsasaka at iba pang mamamayan. Ang hukbo ng mamamayan at ang armadong pakikibaka ay lagi't laging katulong at magtitiyak sa tagumpay.

Ka Andrea, bihag ng AFP, tumakas

PAGKARAAN NG MAHIGIT ANIM na buwang pagkakabilanggo sa kampo ng reaksiyunaryong AFP, nakatakas si Cheryl Arcilla (Ka Andrea) sa ospital ng 5th ID, AFP sa Camp Melchor Dela Cruz sa Soyung, Echague noong ika-30 ng Enero.

Si Ka Andrea ay nahuli ng kaaway sa Dapis, Mapalad, San Agustin noong ika-6 ng Hulyo 2001, sa bahay ng isang masa na nagkanlong sa kanya habang

nagpapagaling ng sakit.

Pagkahuli ay sinampahan siya ng kasong *multiple murder*, isang kasong di napipyansahan. Sangkot siya diumano sa pagkakaambus kay Col. Josefino Manayao at 15 iba pa noong Hunyo 27 sa Linumot, Jones, Isabela. Bukod sa mga kasapi ng Bagong Hukbong Bayan, isinama rin sa kaso maging ang mga walang kinalaman sa ambus kay Manayao katulad nina NDFP

chief political consultant Jose Ma. Sison, Fr. Luis Jalandoni, mga kasapi ng KARAPATAN, mga taong simbahan at iba pa.

Habang bihag ng kaaway ay pilit siyang isinasama sa mga operasyong militar at pinagsasalita sa radyo nang labag sa kanyang kagustuhan. Ilang araw bago makatakas si Ka Andrea ay ipinagmalaki ng AFP na tatayo siyang state witness laban sa mga kinasuhan dito.

Ang patuloy na pananalakay ng pasistang militar sa Cagayan Valley

NITONG PEBRERO 14, 2001, NAGLABAS NG PAHAYAG ang PKP-BHB-NDF-Cagayan Valley na nagkukundena sa pasisitang pananalakay ng AFP mula Disyembre 9, 2000-Enero 9, 2001. Dagdag ang mga kaso rito sa talaang inilabas nila noong Disyembre 14, 2000 hinggil sa paglabag ng AFP sa sarili nitong *suspension of offensive military offensives* o SOMO.

Ang sumusunod ay ilan sa pinakamatitingkad:

Sa Eastern Cagayan

Magmula noong Nobyembre 26, bugbog-sarado ang mga taumbaryo sa Amulung, Alcala at Baggao sa mga operasyong militar na nagpapatuloy hanggang sa kasalukuyan.

Noong Enero 8, humigit-kumulang sa tatlong platon ang naglunsad ng operasyon sa Dalaoig, Cataraoan, Capacuan at iba pang baryo sa Alcala. Sa Dalaoig ay nagsunog ng isang *poultry* ang mga militar.

Bago nito, kinubkob noong Disyembre 4 ng mga tropa ng AFP sa pamumuno ng isang Captain Lapizar ang ilang bahay ng masa na pinaghihinalaang binasehan daw ng BHB sa Baryo Bagunot, Baggao. Nang wala namang nakitang nagbaseng mga Pulang mandirigma roon ay nanakot at binantaan ng mga sundalo ang mga taumbaryo. Dulot ng matinding takot, napilitang itigil ng taumbaryo ang kanilang pagsasaka at iba pang gawain sa bukid. Muling nanghalughog at nanakot ang ang mga tropa ng AFP noong Disyembre 9.

Noong unang linggo ng Enero, sa pagbungad ng Bagong Taon, operasyong militar ang iniregalo ng mga pwersa ng PNP at AFP sa mamamayan ng Barsat West, Baggao at mga karatig-baryo nito.

Nagbubuo rin ng mga pwersang paramilitar sa kabila ng pagtutol ng mamamayan sa lugar. Pilit na itinayo ang CAFGU sa Dadda, Amulung; at sa mga baryo ng Mocag, Mabini, Bitag Pequeño at Agaman Norte sa Baggao. Samantala, nagpapatuloy ang mahigpit na pagtutol ng mamamayan sa pagrerekrut

at pagtatayo ng CAFGU sa mga baryo ng Alba, San Antonio, Barsat West, Masical, Sta. Margarita, Bitag Grande, San Vicente, Bagunot, Caruppian, Taguing at iba pa sa Baggao; at sa mga baryo ng San Manuel, Manalo at Monte Alegre sa Amulung.

Sa Western Cagayan

Ayon sa ulat-koresponsal ng Danilo Ben Front sa Western Cagayan, tuluy-tuloy na naglunsad ng *combat operations* ang 41st IB sa mga bayan ng Rizal (sa Zinundungan Valley), Lasam, Sto. Niño, Piat, Tuao at Allacapan. Nagpapatuloy ang kanilang operasyon hanggang sa kasalukuyan sa Zinundungan Valley.


Sa Southeastern Isabela

Walang-humpay ang operasyong militar na nagsimula pa noong Nobyembre 13, 2000 sa southeastern Isabela. Ayon sa ulat koresponsal ng Benito Tesorio Front, limang platon ng 54th IB PA ang nag-ooperasyon sa Jones-Echague-San Agustin-San Guillermo. Isang platon pa ng 5th ID Reconnaissance Company ang naidagdag sa Jones, Isabela. Paulit-ulit nilang inoperasyon ang Pag-asa, Narra, Aromin, Salvacion, Villa Campo, Villa Rey, Mabbayad, Madadamian, Magleticia sa bayan ng Echague; Aringgay sa San Guillermo; Dicamay, Villa Bello, Linumot, Santa Isabel, Napaliong at Dibuluan sa Jones, Isabela at iba pang karatig-lugar. Naglunsad din sila ng mga operasyong militar sa Dicamay Uno, Dicamay Dos, Diarsatan at Villa Bello sa Jones, Isabela.

Noong naglunsad ng operasyong militar sa Echague, Jones at Angadanan ay pinilit nilang isama ang mga nahuling kasapi ng Bagong Hukbong Bayan na sina Mar “Ka Mar” Rodriguez at JR “Ka CJ” Bulusan. Dinakip ang dalawa ng 54th IB PA noong ika-18 ng Nobyembre 2000 sa Madadamian, Echague, Isabela. Malinaw na paglabag ito sa probisyon ng Protocol II ng Geneva Conventions hinggil sa mga bihag ng digma.

Para bigyang-matwid ang ilulunsad nilang operasyon sa Angadanan-Echague-San Guillermo-Jones na tahasang labag sa sarili nilang SOMO,





ipinakalat ng AFP noong Disyembre 28 na lulusubin diumano ng BHB ang munisipyo ng San Guillermo at Angadanan. Hindi

nga nagtagal ay inilunsad ang operasyong militar sa lugar na nabanggit. Subalit nagresulta lamang ito sa isang *misencounter* sa pagitan ng AFP (sa pamumuno ng isang Lieutenant Arbuez) at ng Philippine National Police (PNP) noong Enero 1.

Dahil sa matinding kahihiyan, hinuli ng militar noong Enero 4 sa Aringgan, San Guillermo at buong yabang na ipinagmalaki na animo'y tropeyo sa gera si Jun Aquino, isang 15 taong gulang na sibilyan na residente ng naturang baryo. Matinding pananakot ang ipinaranas sa binatilyo ng mga elemento ng 5th Recon Coy ng 5th Infantry Division nang pilit nila siyang paaminin na may kaugnayan siya sa BHB.

Bago nito, naglunsad noong Disyembre 13-16 ng *combat operations* ang dalawang platun ng 54th IB sa mga baryo ng Dicamay Uno, Dicamay Dos, Diarsatan at Villa Bello sa Jones, Isabela. Bagamat walang *nameplate* ang mga pasistang tropa, nakikilala pa rin sila ng masa sa lugar.

Naglunsad rin ng *commando at strike operation* ang nakasibilyang mga tropa ng AFP sa Aringgan, San Francisco, Mabbayad, Madadammian, Dipanyong, Benguet at sa mga karatig-baryo nito sa bayan ng San Guillermo. Ang ilan sa kanila ay nagpanggap na mga Pulang mandirigma.

Nagkaroon din *strike operations* sa Garit Sur, Rumang-ay, Dammang West, Dammang East, Reserba at Barkadero sa bayan ng Echague; at *commando operations* sa Narra, Salvacion, Aromin, Villa Campo at Babaran sa naturang bayan mula Disyembre 2-6.

Sa Northern Isabela

Batay sa ulat koresponsal ng Filomena Asuncion Front, laganap ang panunupil ng mga pasistang tropa ng Bravo Coy ng 45th IB

na nakabase sa Sto. Rosario, Delfin Albano at sa Manano Mallig, Isabela. Tuluy-tuloy ang *commando at combat operations* sa Quirino, Delfin Albano, Ilagan, Tumauni, Cabagan at iba pang karatig-bayan noong panahon ng SOMO.

Matingkad ang pananakot at *psywar* ng tropa ng 45th sa pamumuno ng isang Lieutenant Oquiendo sa mga taumbaryo na nagpapatuloy ng mga Pulang mandirigma sa kani-kanilang mga bahay.

Sa Central Isabela

Ayon sa ulat-koresponsal ng Reynaldo Piñon Front, apat na platun ng 45th IB ang naglunsad ng *combat operations* mula Disyembre 8 hanggang sa kalagitnaan ng Disyembre. Muli silang naglunsad ng operasyon pagsapit ng Bagong Taon sa mga baryo ng Benito Soliven, San Mariano, Naguilian at Cauayan.

Sa Quirino at Nueva Vizcaya

Ayon sa ulat ng Venerando Villacillo Front, tuluy-tuloy din ang operasyon ng 54th IB ng 502nd Brigade sa San Agustin, Maddela, Aglipay at Nagtipunan. Gayundin sa Dupax-Aritao hanggang sa Carranglan, Nueva Ecija na dinagdagan ng mga pwersa mula sa 5th ID.

Sa pamumuno ni Lt. Michael Glen Manansala, dalawang pinaghinalaang kasapi ng BHB, sina Luis dela Cruz at Roger dela Cruz, ang walang-awang pinaslang ng 54th IB noong Disyembre 17 sa Sityo Sangaydi, Villa Gracia, Maddela, Quirino. Mismong ang PNP ng Maddela ang nagpatunay na hindi mga Pulang mandirigma at pawang mga ordinaryong sibilyan ang mga pinaslang ng AFP.

Bukod sa paglulunsad ng kontra-rebolusyonaryong digma, sangkot din ang mga pwersa ng 5th ID sa mga kriminal na aktibidad. Maraming kaso ng *highway robbery* sa kahabaan ng Maharlika Highway sa hangganang Nueva Vizcaya-Nueva Ecija ang isinasagawa ng mga pasistang tropa nito. Noong bago mag-Bagong Taon, ninakawan nila ng mahigit P100,000 at mga alahas sa pagitan ng Carranglan, Nueva Ecija at Aritao, Nueva Vizcaya ang isang balikbayan na taga-Luna, Isabela. **AB**



MGA BALITA NG PAKIKIBAKA

7 sundalo patay, 15 armas nasamsam sa reyd ng BHB sa Samar

Pitong sundalo ang napatay at lima ang sugatan nang salakayin ng mga mandirigma ng Bagong Hukbong Bayan (BHB) ang isang ditatsment ng Philippine Army sa Barangay Babaclayon, San Jose de Buan, Samar, bandang alas-4 ng umaga noong Pebrero 12. Nakasamsam din ng 15 matataas na kalibreng armas ang BHB.

Halos nalipol ang 12 sundalong nagbabantay sa ditatsment. Nasamsam mula sa kanila ang walong M16, pitong M14 at isang set ng radyo.

Dayuhang kumpanya, pinarusahan sa Cebu

Pinaulanan ng bala ng isang tim ng BHB ang sasakyang may lulan ng tatlong inhinyero ng TOA Construction sa perimetro ng St. Jude Acres Subdivision sa Barangay Bulacao, Pardo District, Cebu City bandang gabi nitong Pebrero 22. Ang TOA Construction ay isang kumpanyang Hapon. Walang namatay o malubhang nasugatan sa pagtambang.

Ayon sa pahayag ni Kasamang Silvino “Ka Bino” Clamucha, tagapagsalita ng Partido Komunista ng Pilipinas sa Gitnang Kabisayaan, nilayon ng ambus na maiparating sa TOA Construction, at mismong sa gubyrno, ang tahasang pagtutol sa patuloy na konstruksyon ng multi-bilyon pisong South Coastal Road at South Reclamation Project. Nakasaad sa pahayag na ang TOA Construction ay sanhi ng kawalang-hanapbuhay ng may 300 mangingisdang naapektuhan nito sa mga baybayin ng Barangay Aladka Mambaling, Inayawan at Basak sa Cebu City at ilan pang bahagi ng Talisay City. Ayon pa kay Ka Bino, pinarusahan din ng BHB ang TOA Construction dahil sa pagiging malaking salot nito sa kalikasan.

Danding Cojuangco at mga tauhan, kinundena ng BHB

Nanawagan ang PKP-BHB sa isla ng Negros na hindi dapat suportahan at bagkus ay labanan

ang grupo ng negosyanteng si Eduardo “Danding” Cojuangco at ang kanyang mga sinusuportahang kandidato. Ayon sa isang pahayag ng rebolusyonaryong kilusan sa rehiyon, ang kampanya laban sa mga kandidato ni Danding ay kumbinasyon ng pamamaraang armado at di-armado at ligal at iligal. Anang pahayag, nilalayon ng kampanyang tuluyang wasakin ang kapangyarihan ng sagad-sagarang reaksyunaryong si Danding at kanyang mga kasapakat sa isla ng Negros. Ginawa ang pahayag sa harap ng malinaw na bantang pandaraya nina Danding at ng kanyang United Negros Alliance, Nationalist People’s Coalition at Lapian ng Masang Pilipino sa darating na eleksyon sa Mayo 14.

Kinundena rin ng kilusan ang kutsabahan ng kampo ni Danding at ng RPA-ABB sa pagprotekta sa mga kooperatibang nagsisilbi sa mga pampinansyang interes ni Danding sa Negros.

Ka Roger kay Gloria Arroyo-lutasin ang malalaking krimen

Hinamon ng tagapagsalita ng Partido Komunista ng Pilipinas na si Gregorio “Ka Roger” Rosal ang rehimeng Macapagal-Arroyo na kagyat at mapagpasyang aksyunan ang mga kaso ng malalaking krimen “kung hindi nito gustong maunahan ng mga panggugulo at pananabotahe ng mga kalaban nilang hindi matanggap ang kanilang pagkatalo at maging ng mga sumasakay sa mga bagong gubyrno na may sariling adyenda.”

Isinaad ito ni Ka Roger kasabay ng pagpapabula sa mga akusasyon na may kinalaman ang rebolusyonaryong kilusan sa pagpatay kay Filemon “Popoy” Lagman noong Pebrero 6. Ayon kay Ka Roger, walang mahigpit at napakabigat na dahilan para gawin ito ng rebolusyonaryong kilusang may di hamak na mas malaki at mas kagyat na mga prayoridad. Ani Ka Roger: “Ang grupong nagsagawa nito ay sadyang may dalang ibang adyenda at ibang mga prayoridad.”

Isinaad sa pahayag na ang pagpatay kay Lagman ay bahagi ng hangad ng ilang pangkating guluhin ang sitwasyon habang pumupwesto ang bagong



MGA BALITA NG PAKIKIBAKA

gubyrno at ang malawak na masa ng sambayanan ay mahigpit na humihingi ng pagpapatupad ng hustisya at mga repormang ipinag-alsa ng taumbayan sa EDSA. Ibinunyag din ni Ka Roger na kasabay nito'y pinagtatangkaan din ng sabwatan nina Estrada, mga pinunong militar at pulis, Romulo Kintanar, Arturo Tabara, Nilo dela Cruz at iba pa ang buhay ni Kasamang Jose Ma. Sison.

Dagdag ni Ka Roger: "Dapat kagyat na harapin at lutasin ng rehimeng Macapagal-Arroyo ang mga kasong ito, gayundin ang karumal-dumal na mga pambobomba noong Disyembre 30, pagdukot kay Bubby Dacer at higit sa lahat, ang pangungulimbat at iba pang mga krimen ni Estrada at mga kroni niya. "Kung hindi, hindi malayong masadlak ang gubyrnong Macapagal-Arroyo sa kapalarang katulad o mas masahol pa sa sinapit ng pinatalsik na rehimeng Estrada," pagtatapos ni Ka Roger.

Panibagong kaso ng pandarambong laban kay Erap, isinampa ng 81 grupo

Pinangunahan ng Bagong Alyansang Makabayan (BAYAN) ang 81 *peoples' organizations* sa pagsampa ng kasong pandarambong laban sa pinatalsik na si Joseph Estrada nitong Pebrero 8. Ayon sa BAYAN, gagamiting ebidensya sa paglilitis ng kaso ang ilegal na pagmamay-ari ni Erap ng humigit-kumulang P10-15 bilyon na inilagak sa iba't ibang bangko sa ilalim ng iba't ibang alyas.

Kasabay nito, nanawagan ang BAYAN sa rehimeng Macapagal-Arroyo na litisin na ang mga kaso ni Erap upang kagyat na itong maparusahan ayon sa kahilingan ng mamamayan.

Binalaan din ng BAYAN si Ombudsman Aniano Desierto na masusing minamatyagan ng mamamayan upang makamit ang hustisya sa pag-usig kay Estrada, at na walang-pagdadalawang-isip nilang sasampahan ng kasong *impeachment* si Desierto kung papanigan nito ang pinatalsik na pangulo.

Sa kaugnay na balita, itinayo sa Cebu ang

Barug Sugbu o "truth commission" para sa imbestigasyon ng mga kasong pandarambong, katiwalian, korupsiyon at mga paglabag sa mga karapatang-tao ng pinatalsik na si Joseph Estrada. Nanguna ito sa anim-na-puntong adyendang isusulong ng naturang komisyon.

Rehimeng Macapagal-Arroyo, hinamon ng kabataan

Hinamon ng mga grupo ng kabataan at estudyante ang bagong luklok na administrasyon na harapin ang adyenda ng kabataan na tahasang ibinasura ng pinatalsik na rehimeng US-Estrada. Ayon sa isang pahayag ng mga grupo ng kabataan at estudyante na pinangungunahan ng Estrada Resign Youth Movement (ERYM), ang di pagtugon ng nakaraang rehimen sa mga isyu na may kaugnayan sa sektor ng kabataan-estudyante ang dahilan kung bakit daan-daan libong kabataan ang humugos sa mga lansangan upang patalsikin si Estrada.

Ayon sa ERYM, dapat bigyang pansin ng rehimeng Macapagal-Arroyo ang sumusunod na puntong tampok sa sektor ng kabataan-estudyante: (1) Pagtutol sa pagtaas ng matrikula. Pagtigil sa lahat ng anyo ng pagtaas ng matrikula. (2) Pagtaguyod sa mga karapatan ng mga mag-aaral. (3) Pagdagdag sa subsidyo ng estado sa edukasyon. (4) Walang kundisyong pagpapalaya sa lahat ng kabataang detenidong pulitikal.

Hiniling ng kabataan ang pagbasura sa Education Act of 1982 na anila'y ugat ng lahat ng pagtaas ng matrikula. Idiniin din nilang dapat nang pabweluhin ang pagbabalik ng mga konseho at publikasyon ng mga mag-aaral. Sa kasalukuyan, anila, may mahigit 300 kaso ng panunupil sa iba't ibang eskwelahan.

Bukod sa mga kahilingan kaugnay ng kanilang sektor, hinamon din ng mga organisasyon ng kabataan-estudyante ang rehimeng Macapagal-Arroyo na palayain ang lahat ng mga bilanggong pulitikal at kagyat nang usigin at parusahan ang pinatalsik na pangulong Joseph Estrada.



MGA BALITA NG PAKIKIBAKA

Cerilles, binatikos ng mga kawani ng DENR

Tinuligsa ng DENR Kalikasan at Association of Contractual Employees of the DENR sa pangunguna ng COURAGE ang pagpapasinungaling ng kalihim ng DENR at kroni ni Estrada na si Antonio Cerilles na nag-isyu siya ng *midnight appointments* at Environmental Clearance Certificates sa bisperas ng pagbagsak ni Estrada.

Sa raling idinaos sa pangalawang pagkakataon, ibinunyag ng mga kawani na pumirma si Cerilles ng mga espesyal na kautusang muling nagtatalaga sa kanyang mga tauhan mula sa upisina ng kalihim papunta sa mga lunsod ng Zamboanga del Sur, Cebu, Ozamis at Pagadian na kilalang balwarte ng mga Cerilles, at mga ECC at kontrata pabor sa mga sindikato sa panonoroso.

Ayon sa mga nagraling kawani, hindi na sila papayag na pamunuan pa ni Cerilles na tauhan ng pinatalsik ng EDSA 2 na si Estrada. Sabi pa nila, susubaybayan nila ang bawat hakbang ni Cerilles hangga't hindi umuupo sa pwesto ang bagong kalihim ng kawanihan, at hindi na papayag na malimutan ang mga aral mula sa pakikibaka kapwa laban kay Cerilles at kay Estrada.

Fishpond ng kroni, binuwag ng taumbaryo ng Infanta

Binuwag nitong Pebrero 7 ng mahigit 1,500 taumbaryo ng Infanta, Quezon, ang 15-ektaryang iligal na *fishpond* na pag-aari ni Macario "Boy" Asistio, dating alkalde ng Caloocan at malapit na kaibigan ni Joseph Estrada.

Sa pamamagitan ng mga pala, bareta at kahoy, winasak ng mga residente ng Infanta ang dike ni Asistio bilang pagtutol sa *fishpond* na naging sanhi ng kawalan ng kabuhayan para sa mga residente ng lokalidad. Nang unang ipagawa ang dike, walang-patumanggang sinira ng mga utusan ni Asistio ang bakawan sa abandonadong *fishpond* sa Barangay Binulanan nang walang pahintulot kapwa ng DENR at ng taumbaryo.

Wala nang nagawa ang mga manggagawa sa *fishpond* at ang mga awtoridad nang nagdatingan lulan ng mga traysikel, trak at iba pang sasakyan ang mga mambubuwag ng *fishpond* ni Asistio. Anang mga namuno sa kanila, ginawa nila ito upang idiin na "walang makapagkakait ng libreng mapagkukunan ng kabuhayan sa mamamayan" ng Infanta. Kinundena rin ng mamamayan ang pangingimi ng Malakanyang sa isyung ito.

Planong asasinasyon kay Ka Joma, inilantad

Inilantad at kinundena ni Kasamang Jose Ma. "Joma" Sison, tagapangulong tagapagtatag ng Partido at punong konsultant sa pulitika ng NDFP, ang panibagong planong asasinasyon laban sa kanya. Batay sa mga impormasyong nakalap sa mga nagdaang taon, aniya, ang plano, taktika at mga operatibang ginagamit para rito ay tumuturo sa mga utak nito na sina Panfilo Lacson, dating hepe ng PNP at tapat na kasapakat ni Estrada, kasama ang hepe ng paniktik ng PNP na si General Yarcia, ang taksil-sa-rebolusyon na si Romulo Kintanar, mga gangster na sina Arturo Tabara at Nilo dela Cruz ng RPA-ABB at ang pasimunong si Joseph Estrada.

Sa isang pahayag na inilabas nitong Pebrero 3, kinumpirma ni Kasamang Joma ang ibinunyag ni Col. Reynaldo Berroya noong Enero 31 na plano siyang ipapatay nina Estrada't Lacson. Ang planong ito ay noon pang Mayo ng taong 2000 inihanda at kaagad na natuklasan ng NDFP dahil na rin sa palasak na estilo sa pagmamanman ng mga salarin.

Kasabay nito, iginiit ni Kasamang Joma kay Estrada na kagyat nitong kanselahin ang order kay Kintanar at sa mga tauhan nito. Nanawagan din siya sa mga operatibang nakatakdang magsagawa ng plano na kumalas na sa planong ito dahil tiyak na hindi rin ipagkakaloob nina Estrada ang pangako nito matapos ang operasyon. Ipinahayag din ni Kasamang Joma ang pag-asang maaaksyunan ng kasalukuyang administrasyon ang pagpigil sa